



Inatsisartuni ilaasortaq
Aqqaluaq B. Egede, Inuit Ataqtigiit

SAR pillugu § 37 naapertorlugu apeqquteqaammut akissut normu 263-2018

Brevdato: 17-10-2018
Sagsnr.: 2018 - 20083
Akt-id: 8881572
Postboks 1614
3900 Nuuk
Tlf. (+299) 34 50 00
Fax (+299) 34 54 10
E-mail: pan@nanoq.gl
www.naalakkersuisut.gl

Asasara Aqqaluaq B. Egede

1. oktober 2018-imi Kalaallit Nunaanni SAR-imut upalungaarsimaneq pillugu Naalakkersuisunut apeqquteqarputit. Apeqqutitit uannut akisassanngorlugit innersuunneqarput.

Kalaallit Nunaanni ujaasinerni annaassiniarnernilu sullissineq (SAR) naalagaaffiup akisussaaffigaa. Taamaattumik Naalakkersuisut Illersornissamut Ministereqarfik qinnuigaa, apeqqutinut nassiunneqartunut akissuteqarnissamut ikiorseeqqullugu.

1. Annaassiniartarneq pillugu naalagaaffiup isumaqatigiissusiornerata ulloq naammassiffissaa oqaatigineqarsinnaava?

Illersornissamut Ministereqarfik imaattumik ilisimatitsissuteqarpoq:

"Ilisimatitsissutigineqarsinnaavoq, Kalaallit Nunaanni nunamiit qulimiguulimmik upalungaarsimatitsineq ullumikkut sullissisumit namminersortumit isumagineqarmat. Taamaattumik Sakkutuut namminneerlutik suliassamik isumaginninnissamut annertussusiligaanngillat, taamaattumillu Illersornissamut Ministereqarfiup isumaqatigiissut maanna atuuttoq suli naanngitsoq suliassamut neqerooruteqartitsineq aallartippaa. Neqerooruteqartitsinermi ajugaasup 2018-imi oktobarip naanerani tamanut ammasumik saqqummiunneqarnissaa, aammalu qulimiguulimmik upalungaarsimatitsinermit isumaqatigiissutip nutaap 1. januar 2019-imi atuutilernissaa naatsorsuutigineqarpoq".

2. Nunatsinni annaassiniarnermi helikopterit naalagaaffiup massakut atugaasa assingi nunatsinni aamma atorreqassappat?

Illersornissamut Ministereqarfik imaattumik ilisimatitsissuteqarpoq:

"Neqerooruteqartitsinermit qulimiguulimmik aalajangersimasumik atuinissaq piunasaqatigineqanngilaq.

Kalaallit Nunaanni nunamiit qulimiguulimmik upalungaarsimatitsinissaq pillugu isumaqatigiissummi nutaami pilersuisuusussap timmisartuussilinnginnerani isumannaallisaanermut piumasaqaatit arlalippassuit naammassineqarsimanissaat piumasarineqarpoq. Pilersuisup piumasaqaatit taakku naammassisimangippagit timmisartuussinissamut akuersissut tunniunneqassanngilaq.

Tassalu suliaasaqarfimmi timmisartut, qulimiguullit inuttallu timmisartuussinermi isumannaallisaanermut piumasaqaatinik naammassinissimanissaat oqartussaasut tungaanniit eqqumaffigineqartorujussuuvoq.

Pilersuisup ilaatigut EU-mi silaannakkut angallassinermut malittarisassat naapertorlugit Europami suliaasaqarfimmut pitsaassuserititassat naammassisimasussaavai. Pitsaassuserititassat taakku European Aviation Safety Agency-mit, ilaatigut isumannaallisaanermut avatangiisinillu illersuineranut ataatsimoortumik maleruagassanik pitsaassuserititassanillu ineriartortitsinermik atuutsilertarnermillu isumagisaqartumit, sullissisunut akuersissutinik tunniussisartumit, timmisartunik motoorinillu akuersisartumit, kiisalu nunani ilaasortaasuni ataasiakkaani nakkutilliinernik isumagisaqartumit aalajangersarneqartarput.

Taakku saniatigut pilersuisup inuussutissarsiutigalugu silaannakkut angallassinermi ingerlatsinissamut akuersissummik, "Air Operator's Certificate"-mik (AOC) taaneqartumik pissarsinissamut Angallanneranut, Sanaartornermut Ineqarnermullu Aqutsisoqarfiup piumasaqaatai naammassisimasussaavai. Akuersissut taanna nunap iluani silaannakkut angallassinermut oqartussaasunit tunniunneqartarpoq, aammalu sullissisup isumannaallisaaneq, taamatullu sulisuni avatangiisinilu illersorniarlugit, eqqortunik sulisoqarnissaa, atortoqarnissaa suleriaaseqarnissaa piumasarineqarpoq."

3. Ilumoorpa nunatsinni annaassiniartarneq pillugu isumaqatigiisusiornerup malitsigisaannik helikopterit Super Puma pitsaanerpaajunngitsut nunarsuullu sinnerani atorumanerukkiartortut akikinnerat pissutigalugu nunatsinni annaassiniarnermi atorniarneqartut?

Apeqqutit 1-imut aamma 2-mut akissutit takukkit.

4. Helikopterit suut nunatsinni annaassiniarnermi atorneqartussatut siunniunneqarpat?

Apeqqutit 1-imut aamma 2-mut akissutit takukkit.

5. Sooq naalagaaffiup helikopterit atugaat nunatsinni aamma atussanngilagut?

Apeqqutit 1-imut aamma 2-mut akissutit takukkit.

6. Ilulissani aamma nunatta kujataani annaassiniarnermi isumannaallisaa ner mi piareersimasut Super Puma-t inissinneqassappat?

Naalakkersuisut maannarpiaq qulimiguulimmik upalungaarsimatitsineq pillugu isumaqatigiissutissap immikkoortuinik ilisimasaqanngillat.

7. Sooq naalakkersuisut naalagaaffeqatitsinnut annaassiniartarnermi akisussaasuusunut qaffasissunik piunasaqaateqanngillat?

Kunngaqarfik Danmark nunani tamalaani imarsiornermut silaannakkullu angallassinermut isumaqatigiissutinut atsioqataasutut Kalaallit Nunaanni ujaasinerni annaassiniarnernilu sullissinernik aqqissuussinissamut imminut pisussaatiippoq. Kunngaqarfiup Danmarkip SAR-imut isumaqatigiissummi piunasaqaatinut naammassinninnissaanut Illersornissamut Ministereqarfik aamma Inatsisinik Atuutsitsinermut Ministereqarfik akisussaasuupput.

Suliassaqarfimmut isumaqatigiissutit atuuttut naapertorlugit SAR-imut suliassaqarfiup qaffasissumik pitsaassuseqarnissaanut Naalagaaffik qulakkeerisimassasoq Naalakkersuisunit naatsorsuutigineqarpoq.

8. Isumaqatigiissut helikopterunik nutaanik piunasaqaateqartinnagu atsiorneqannginnissaa naalakkersuisut isumaqatigaat?


Danskit naalagaaffiat Kalaallit Nunaanni SAR-imut upalungaarsimaneq pillugu nutaanik isumaqatigiissusiortussaavoq. SAR-imut upalungaarsimaneq naalagaaffiup suliassarimmagu, Naalakkersuisut Kalaallit Nunaanni SAR-imut upalungaarsimanermut isumaqatigiissummut nutaanut atsiortussaangillat.

Tamatuma saniatigut apeqqut 7-imut akissut takuuk.

9. Naalakkersuisut helikopterunik pitsaasunik aamma sillimaniarnikkut pitsaasutut isigineqartunik piunasaqaateqarnissaat pisariaqartoq qulakkeerniarneqarpa?

Suliassaqarfimmut isumaqatigiissutit atuuttut naapertorlugit SAR-imut suliassaqarfiup qaffasissumik pitsaassuseqarnissaanut Naalagaaffik qulakkeerisimassasoq Naalakkersuisunit naatsorsuutigineqarpoq.

Inussiarnersumik inuulluaqqusillunga



Siverth K. Heilmann